

Inuusuttut inissiaat pillugit nassuiaammik Naalakkersuisut kingusinnerpaamik UKA2019-imi saqqummiussinissaat pillugu Inatsisartuni aalajangiiffigisassatut siunnersuut. Nassuiaammi inissianik sanaartornermi maanna suliniutaareersut sakkussallu tassunga attuumassuteqartut, soorlu ineqarnermut tapiissutinik nalilersuinermik imaqarlunilu maanna ingerlanneqartunit pisariaqartitsineq naammassineqarsinnaanngippat suliniutinut tapiliussassanut kaammattuutinik imaqassaaq

(Inatsisartuni ilaasortaq, Mimi Karlsen, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisut sinnerlugit Inatsisartuni ilaasortaq Mimi Karlsen, Inuit Ataqatigiinneersoq, aalajangiiffigisassatut siunnersuummik saqqummiussineranut qutsavigaara.

Naalakkersuisut Kalaallit Nunaanni sanaartukkanik, innuttaasut pisariaqartitaannut naleqqussakkanik takorluugaqareerput. Taakkununga assersuutitut ”inissiat tamanit atorneqarsinnaasut”, Qaqortumi Sisimiunilu sanaartorneqartut aammalu illoqarfinni allani sanaartorneqartussaasut taaneqarsinnaapput. Inissiat tamanit atorneqarsinnaasut tassaapput inissiat minnerusut, soorlu ilinniartunut, inuusuttunut, pensionistitut allanullu, minnerusuni akikinnerusunilu najugaqarusuttunut naleqqussakkat.

Naalakkersuisut tamanit atorneqarsinnaasunik inissialiortiternermikkut inissianik qaffasissumik pitsaassusilinnik, eqaatsumik ilusilersorneqarsinnaasunik inituutullu misigisimanarluartunik sanaartornissaq siunnerfigaat. Tamatuma peqatigisaanik ineqarnermut akiliutit ukiumiit ukiumut naatsorsuutigiuminartuunissaat allanngorannginnissaallu pingaaruteqarpoq. Taamaattumik ingerlatsinermit aningaasartuutit appasinnerpaatinneqassapput, taamaalillunilu atortut sivisuumik atasinnaassallutik pitsaasumillu pisoqaliartorsinnaassallutik.

Tamatuma peqatigisaanik Naalakkersuisut ilisimatitsissutigisinnaavaat, Namminersorlutik Oqartussat inissiaataannut attartortittakkanut pilersarusiortoqarsimammat, tassanilu ilaatigut illoqarfinni ataasiakkaani inissianik pisariaqartitsineq taakkulu ukiuisa agguarsimanagerat takuneqarsinnaapput.

Tamanna pequtigalugu Naalakkersuisut siunnersuutip itigartinneqarnissaanik inassuteqarput.